

Pelajar 4

SAKSI KRISTUS TI MESIAH

“Jesus lalu nyaut iya, ‘Enggau bendar Aku madah ngagai nuan, nadai orang ulih meda Perintah Allah Taala enti iya enda diadaka baru’ ” (*John 3:3*).

“Kami udah ninga Iya lalu mata kami empu udah meda Iya. Kami sigi amat udah meda Iya, lalu jari kami empu udah negu Iya. Kami madahka ngagai kita utai ti udah dipeda enggau didinga kami ” (*1 John 1:1, 3*).

Ari pun pengawa Jesus, John endang udah enggau Iya sereta arapka Iya meh Mesiah. Tang dalam injil iya, John nadai betatak ba saksi ari iya empu aja, tang nambah nya enggau saksi orang bukai pasal Jesus ti Mesiah, Penyelamat enggau anak domba ke mati ungkup dosa dunya.

A Saksi ari John Pemptisa:

❖ Madahka Mesiah. *John 1:19-23*.

“Ke datai dudi ari aku. Indah muka tali kasut Iya deh aku enda tau” (*John 1:27*).

— Betani ke alai John maptisa tu, enda jauh ari Jeriko enggau Jerusalem (*John 1:28*). Mayuh orang datai deka ninga sereta dibaptisa iya. Sekeda ari orang nya, bala sida pengajar adat enggau orang Parisi.

— Berita penatai orang tu ditemu bala ketuai orang Judah (Sanhedrin) lalu sida ngirumka pengari ngambika nanya John sekalika iya meh ke Mesiah tauka Kristus (*John 1:19*). Tang John ukai Mesiah. Pengawa ke dikereja iya: nyendiaka orang mayuh nerima Mesiah ke bendar (*John 1:22-23*).

— John besaksi lalu madahka Kristus lebih tinggi agi ari iya:

(1) John nganggap diri empu enda patut nyadi pengereja ke orang ti idup dulu agi ari iya (*John 1:27*).

(2) John maptisa ngena ai, tang Kristus ngereja pengawa nya ngena Roh (*John 1:33*).

(3) Kristus Anak Allah Taala, John semuti nunjuk aja (*John 1:34*).

❖ Madahka Anak Domba Allah Taala. *John 1:29-37*.

“Hari siti John tepedaka Jesus mansang ngagai iya, lalu ku John bejaku, ‘Peda kita, nyin Anak Domba Allah Taala, ke muai dosa dunya’ ” (*John 1:29*).

— John Pemptisa ke datai ari peturun imam, lalu iya nemu bendar ke pengawa Mesiah. Ba iya, Kristus tu ukai pengelepas bansa sida ari munsuh, tang orang ke disebut nabi Isaiah enggau jaku ke munyi tu, “Baka anak domba ti baru deka disayat” (*Isa. 53:7*).

— Ni penyuah John udah ngaku dosa ari ke ngengkahka jari iya ba atas pala anak domba lepas nya lalu ngayang iya enggau ladin? Genap kali iya ngereja nya, iya ingatka siku orang ti deka ngema dosa iya sereta mati kategal nya.

— Ari padah Allah Taala, iya ngelala Jesus meh ti deka nyadi Anak Domba ke danti (*John 1:31-33*). Nya alai Iya enda diau diri tang madah ngagai orang bukai pasal sapa Kristus, lalu nama pengawa Iya ke nyadi Anak Domba Tuhan (*John 1:29*).

— Jaku nya meri kitai penerang ba reti atur begenselan ke dipesan Tuhan ngagai orang Israel. Ba darah Anak Domba ti tekelibak bisi kuasa meresi genap iti dosa ke diaku.

B Saksi ari murid ti terubah:

❖ Nitihka Mesiah. *John 1:35-39*.

“Hari siti John berdiri baru enggau dua iku ari sida murid iya, [...] Lebu seduai iya ninga John nyebut nya, seduai iya lalu nitihka Jesus” (*John 1:35,37*).

— Sapa dua iku murid ti terubah nitihka Jesus (*John 1:35-37*)? John semina nyebut siku aja, Andrew tang nadai nyebut nama iya empu (*John 1:40*).

- Seduai endang amat nitihka Jesus ari belakang. Nya kebuah seduai bejalai entudika Iya, datai ngagai timpuh alai Jesus malik lalu bejaku enggau seduai (*John 1:38*).
- Tanya Jesus - nama ke digiga seduai? Tu lalu meri peluang seduai madahka utai ti dikedeka seduai ari Iya. Nama saut nuan? Nama kebuah nuan nitihka Jesus?
- Dua iku murid tu udah nerima Jesus ke Mesiah. Diatu seduai deka begulai enggau Iya. Seduai nitihka Iya laban deka ninga ajar Iya sereta ngirup penemu ari penau Iya.
- Kelalu gaga laban udah tetemuka Mesiah, Andrew lalu mai Simon bekelala enggau Jesus. Jesus ngayanka diri nemu bendar ke ati enggau ulah Peter (*John 1:40-42*).

❖ **Mai orang bukai datai ngagai Mesiah. John 1:43-51.**

“Philip tetemuka Natanel, lalu madah ngagai iya, ‘Kami udah tetemuka orang siku ke dikenang Moses dalam Bup Adat enggau ditulis sida nabi, Jesus anak Josep, ari Nasaret.’” (*John 1:45*).

- Murid ti ketiga nitihka Jesus dikangau Iya terus: Pilip (*John 1:43-44*).
- Sebaka enggau Andrew mega, Pilip ngasai diri mesti mai orang datai ngagai Jesus. Bebida ari Andrew, Pilip enda nyebut Jesus nya Mesiah, tang iya nyebut Jesus nya orang ke dipadah Moses enggau bala nabi, lalu tu ngasuh Natanel (Bartholomew) berundingka pekara nya kediri empu. Tang Jesus enda ngaga diri engkeman nitihka penemu Mesiah Natanel.
- Ada ba Nasaret ke bempu nama ke jai? Pilip enda enggau dalam randau tu. Ba teori tu enda nyadi ke penusah. Iya arap udah ke meda Jesus (*John 1: 46*).
- Lebu ti deka betemu enggau Jesus ke dipadah John, Natanel besampi dulu ba pun kayu (DA 140). Lebu Jesus madah ngagai Iya, “Aku meda nuan,” semua ati ke nadai arap lalu lenyau (*John 1:47-49*).

C Saksi ari Nikodemus:

❖ **Tetemuka Mesiah. John 3:1-21.**

- Nikodemus ke orang Parisi enggau Sandhedrin, alit ati kategal pengawa ajih Jesus. Ari nya iya arap bendar ke Jesus endang nabi besai ke datai ari Allah Taala, tang ukai Mesiah (*John 3:1-2*).
- Jesus betunga enggau iya lalu terus ngagai utai ke balat diguna iya (diguna kitai mega): ati ti berubah (*John 3:3-5*).
- Taja iya nguji deka nyeliahka pekara nya, Nikodemus udah nerima ajar ke pengabis besai ari misi Kristus, lalu udah mega ninga jaku ti ngembuan reti ti besai bendar (*John 3: 16*).
- Iya nerima jaku anu ari Jesus mimit, laban dikena muka runding iya ngagai batang pemendar (*John 3:9-12*).
- Belubah-lubah Nikodemus tetemuka Mesiah, lalu datai ngagai maya iya nyambut Mesiah enggau chara ke terbuka agi ba pun kayu regang (*John 7:50-51; 19:39*).

“Laban sida bepanggai ba iring ari kuasa mensia, ari nya nadai siku sida tekelalauka batang pemendar. Sebaka enggau Natanel kitai enda tau enda belajarka jaku Allah Taala kediri empu, sereta besampika penemu ari Roh Kudus. Iya ke meda Natanel ba baruh kayu ara, mega meda kitai ba endur kitai besampi ti kediri. Melikat ari dunya ti terang deka besemak enggau orang ti baruh ati minta iring Tuhan.”